



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na I. nastavku 49. redovne sjednice održanom 12. juna 2019. godine, usvaja

ZAKON
O IZMJENAMA I DOPUNAMA ZAKONA O POLICIJSKIM SLUŽBENICIMA
BRČKO DISTRIKTA BOSNE I HERCEGOVINE

Član 1

U Zakonu o policijskim službenicima Brčko distrikta Bosne i Hercegovine (Službeni glasnik Brčko distrikta BiH, brojevi: 41/07, 4/08, 36/09, 60/10, 37/14 i 13/16), u članu 10 stavu 1 iza tačke b) dodaju se nove tačke c) i g) koje glase:

„c) testiranje pomoću poligrafa;”

Dosadašnje tačke c), d) i e) postaju tačke d), e) i f).

Iza nove tačke f) dodaje se nova tačka g) koja glasi:

„g) protudiverzioni pregled;”

Dosadašnje tačke f), g), h), i), j), k), l) i m) postaju tačke h), i), j), k), l), m), n) i o).

Stav 2 mijenja se i glasi:

„(2) Ovlaštenja iz stava 1 ovog člana daju se u svrhu sprečavanja krivičnih djela, prekršaja, održavanja javnog reda i mira, kontrole sigurnosti saobraćaja, osiguranja javnih skupova, osiguranja lica i imovine i obavljanja drugih poslova iz nadležnosti Policije.“

Član 2

Iza člana 15 dodaje se novi član 15a koji glasi:

„Član 15a
(Testiranje pomoću poligrafa)

(1) Policijski službenik, u okviru svojih nadležnosti propisanih zakonom, vrši psihofiziološka ispitivanja odnosno testiranje određenih lica pomoću poligrafa.

(2) Način provođenja testiranja pomoću poligrafa reguliše se aktom koji donosi šef Policije.”

Član 3

Iza člana 20 dodaje se novi član 20a koji glasi:

„Član 20a
(Protudiverzioni pregled)

(1) Protudiverzioni pregled obuhvata pregled ili otkrivanje eksplozivnih sredstava ili naprava, kao i hemijsko-biološko-radiološko-nuklearni i drugi pregled.

(2) Policijski službenik je ovlašten:

a) izvršiti protudiverzioni pregled prostora, objekata, sredstava ili drugih predmeta radi zaštite sigurnosti ljudi i imovine;

b) isprazniti prostor ili objekat i spriječiti pristup do objekta, s ciljem izvršenja protudiverzionog pregleda;

c) na mjestu pronalaska opasnog predmeta, eksplozivnih sredstava ili naprava pozvati organ nadležan za uništavanje predmeta koji predstavlja neposrednu opasnost za život ili zdravlje ljudi ili opasnost za imovinu ako ga ne može na drugi način učiniti bezopasnim.

(3) Prilikom vršenja protudiverzionog pregleda policijski službenik može od nadležnog organa zahtijevati izvršenje nadzora i preduzimanje mjera iz svoje nadležnosti.”

Član 4

U članu 33 stav 2 mijenja se i glasi:

„(2) U smislu ovog zakona, sredstva sile su: fizička sila uključujući i borilačke vještine, palica, sredstva za vezivanje, uređaj za prisilno zaustavljanje lica ili vozila, hemijska sredstva, vatreno oružje, službeni psi, vođeni topovi, specijalna vozila, specijalne vrste oružja, eksplozivne naprave i električni uređaji za privremeno onesposobljavanje.“

Član 5

Iza člana 47 dodaje se novi član 47a koji glasi:

„Član 47a

(Psihološka pomoć i psihološka podrška)

(1) S ciljem zaštite mentalnog zdravlja Policija osigurava stručnu psihološku pomoć i psihološku podršku policijskim službenicima u slučaju psihičkih opterećenja u primjeni policijskih ovlaštenja i u drugim slučajevima, koji utiču na obavljanje policijskih poslova i zadataka, kao i sudjelovanje u programima koji su namijenjeni savladavanju psihičkih opterećenja.

(2) Psihološku pomoć i psihološku podršku iz stava 1 ovog člana Policija može da osigura i članovima uže porodice policijskog službenika.

(3) Vrste i način psihološke pomoći i podrške, te stručno usavršavanje policijskog službenika za savladavanje psihičkih opterećenja utvrđuju se podzakonskim aktom koji donosi šef Policije.“

Član 6

U članu 56 stavu 1 tačka c) mijenja se i glasi:

„c) da ima najmanje IV. stepen školske spreme za čin policajca, a najmanje završen prvi ciklus visokog obrazovanja ili VII. stepen školske spreme za čin mlađi inspektor.“

Član 7

Član 57 mijenja se i glasi:

„Član 57

(Posebni uslovi za kandidate)

(1) Pored općih uslova iz člana 56 ovog zakona kandidat mora ispunjavati i posebne uslove.

(2) Posebni uslovi iz stava 1 ovog člana su:

a) da nema sigurnosnih smetnji shodno utvrđenom stepenu tajnosti za radno mjesto u skladu sa Zakonom o zaštiti tajnih podataka i

b) drugi posebni uslovi utvrđeni Pravilnikom o unutrašnjoj organizaciji i sistematizaciji radnih mjesta.”

Član 8

Iza člana 63 dodaje se novi član 63a koji glasi:

„Član 63a (Sigurnosne provjere kandidata)

- (1) Nakon odobravanja konačne liste iz člana 63 stava 2 ovog zakona, vrše se sigurnosne provjere kandidata u skladu sa Zakonom o zaštiti tajnih podataka.
- (2) Kandidat koji ne prođe sigurnosnu provjeru iz stava 1 ovog člana isključuje se iz daljnje procedure.
- (3) Upraznjena pozicija na konačnoj listi ne može se popunjavati drugim kandidatima koji su učestvovali u proceduri.

Član 9

Iza člana 64 dodaje se novi član 64a koji glasi:

„Član 64a (Zapošljavanje policijskih službenika iz drugih policijskih organa)

- (1) Policija može putem javnog konkursa zapošljavati policijske službenike koji su zaposleni u nekom drugom policijskom organu u BiH.
- (2) Zapošljavanje iz stava 1 ovog člana može se vršiti za sva radna mjesta s bilo kojim činom, uključujući i radno mjesto u činu policajca i činu mlađeg inspektora, pod uslovom da se nisu mogla popuniti unapređenjem policijskih službenika Policije.
- (3) Policijski službenik zapošljava se u Policiji u istom činu koji je imao u policijskom organu u BiH u kojem je prethodno bio zaposlen.
- (4) Postupak izbora i zapošljavanja policijskih službenika iz drugih policijskih organa u BiH utvrđuje se podzakonskim aktom koji donosi Vlada na prijedlog šefa Policije.”

Član 10

U Glavi III. Postavljanje i raspoređivanje, naziv Odjeljka A. mijenja se i glasi: „Imenovanje i razrješenje šefa i zamjenika šefa Policije, regulisanje prava iz radnog odnosa u slučaju imenovanja policijskog službenika na mandatnu poziciju u drugi policijski organ u BiH“.

Član 11

Iza člana 69 dodaju se novi članovi 69a i 69b koji glase:

„Član 69a (Poseban slučaj neplaćenog odsustva u slučaju imenovanja na mandatnu poziciju u drugom policijskom organu u BiH)

- (1) Policijskom službeniku koji je imenovan na poziciju rukovodioca ili zamjenika rukovodioca u drugi policijski organ u BiH, prava i obaveze iz radnog odnosa u Policiji miruju od dana imenovanja na mandatnu poziciju, donošenjem rješenja o neplaćenom odsustvu.

(2) Rješenje o neplaćenom odsustvu na osnovu zahtjeva policijskog službenika koji podnosi u roku od osam dana od dana prijema akta o imenovanju, donosi:

a) gradonačelnik, za policijskog službenika koji se u trenutku imenovanja nalazi na poziciji šefa Policije;

b) šef Policije za ostale policijske službenike.

Član 69b

(Vraćanje u policijski organ po okončanju mandata u drugom policijskom organu)

(1) Policijski službenik iz člana 69a stava 1 ovog zakona podnosi zahtjev šefu Policije za vraćanje u Policiju i to u čin koji je imao na dan imenovanja na mandatnu poziciju.

(2) Zahtjev iz stava 1 ovog člana policijski službenik podnosi u roku od 30 dana prije isteka mandata, odnosno u roku od osam dana po prestanku mandata.

(3) O zahtjevu iz stava 1 ovog člana odlučuje šef Policije, u roku od 15 dana od dana prijema zahtjeva.“

Član 12

U članu 72 stavu 3 riječi: „najduže 6 (šest) mjeseci” zamjenjuju se riječima: „do 1 (jedne) godine”.

Član 13

U članu 76 stav 1 mijenja se i glasi:

„(1) Višak policijskih službenika može se pojaviti isključivo u slučajevima reorganizacije, smanjenja obima posla ili postojanja sigurnosne smetnje.

Član 14

U članu 79 stavu 2 iza riječi: „činu“ umjesto tačke „(.)“ stavlja se „zarez (,)” i dodaju riječi: „u Policiji.“

Stav 3 se briše.

Član 15

Član 82 mijenja se i glasi:

„Član 82

(Unapređenje)

(1) Policijski službenik koji se prijavi za unapređenje u činove narednika, mlađeg inspektora i samostalnog inspektora polaže interni ispit za unapređenje u te činove.

(2) Ukoliko policijski službenik koji je proveo tri godine u Policiji ima ili stekne viši stepen školske spreme tokom rada u Policiji i ispuni uslove iz člana 83 stava 2 tački b), c), e) i f) ovog zakona, može se prijaviti za početni čin koji odgovara njegovoj školskoj spreml, pod uslovom da postoji slobodno radno mjesto.

(3) Procedura unapređenja policijskih službenika, način ocjenjivanja i bodovanja kriterija iz člana 83 stava 3 ovog zakona utvrđuje se pravilnikom koji donosi šef Policije.“

Član 16

Član 83 mijenja se i glasi:

„Član 83

(Kriteriji i uslovi za unapređenje)

(1) Policijski službenik dobija naredni viši čin kada se ispune svi sljedeći uslovi:

- a) da je za čin u koji bi mogao biti unaprijeđen u skladu s ovim zakonom interno oglašeno slobodno mjesto ili da u okviru njegovog radnog mjesta postoji mogućnost unapređenja u viši čin;
- b) da se prijavio za slobodno mjesto iz tačke a) ovog stava, odnosno podnio zahtjev za unapređenje;
- c) da ima preporuku Komisije za unapređenje.

(2) Pri davanju preporuke iz stava 1 tačke c) ovog člana, Komisija za unapređenje vodi računa da policijski službenik ispunjava sve sljedeće kriterije:

- a) da je proveo zakonom propisano vrijeme u prethodnom činu;
- b) da je za svoj rad s posljednje tri godišnje ocjene bio ocijenjen ocjenom "dobar" ili višom ocjenom;
- c) da se protiv njega ne vodi krivični ili disciplinski postupak za težu povredu službene dužnosti;
- d) da je položio interni ispit za unapređenje;
- e) da mu nije izrečena disciplinska mjera obustavljanje unapređenja u viši čin;
- f) da mu nije izrečena disciplinska sankcija za težu povredu službene dužnosti zbog koje se može izreći prestanak radnog odnosa."

(3) Prilikom rangiranja kandidata prijavljenih za unapređenje vrši se ocjenjivanje i bodovanje sljedećih kriterija:

- a) ocjene rada u posljednje tri godišnje ocjene rada;
- b) vrijeme provedeno u trenutnom činu;
- c) relevantno profesionalno iskustvo u Policiji u statusu policijskog službenika;
- d) pohvale i nagrade dodijeljene od šefa Policije u trenutnom činu;
- e) vrsta i stepen stručne spreme."

Član 17

Član 85 mijenja se i glasi:

„Član 85 (Postupak unapređenja)

- (1) Nadležna služba Policije zadužena za kadrovska pitanja:
 - a) jednom godišnje priprema listu policijskih službenika koji ispunjavaju uslove za unapređenje u okviru svog radnog mjesta;
 - b) po potrebi, a najmanje jednom godišnje, priprema listu slobodnih radnih mjesta za sve činove za unapređenje, s izuzetkom početnih činova.
- (2) Lista iz stava 1 ovog člana dostavlja se šefu Policije koji odlučuje o pokretanju postupka za unapređenje.
- (3) Na osnovu odluke iz stava 2 ovog člana šef Policije imenuje komisiju za unapređenje.
- (4) Komisija za unapređenje se sastoji od tri člana čiji su činovi jednaki ili viši od činova koji se zahtijevaju za radno mjesto za koje se kandidati razmatraju za unapređenje, a imaju najmanje čin višeg inspektora.
- (5) Prije objavljivanja slobodnih radnih mjesta iz člana 83 stava 1 tačke a) ovog zakona, komisija za unapređenje razmatra slučajeve posebnih unapređenja u skladu s članom 86 ovog zakona.
- (6) Komisija za unapređenje sačinjava rang-listu kandidata i predlaže šefu Policije kandidate koji su dobili najviše bodova u skladu s Pravilnikom iz člana 82 stava 3 ovog zakona i broju slobodnih radnih mjesta koja su interno objavljena.
- (7) Ukoliko je pravosnažnom odlukom suda poništena odluka o unapređenju u viši čin, policijski službenik se raspoređuje na radno mjesto u činu koji je imao prije donošenja poništene odluke.

Član 18

Član 86 mijenja se i glasi:

„Član 86

(Posebno unapređenje)

(1) Policijski službenik, nakon pokretanja procedure unapređenja u skladu s članom 85 stavom 2 ovog zakona ili u okviru svog radnog mjesta, može podnijeti prijavu za posebno unapređenje ukoliko ispunjava sljedeće uslove:

- a) da je za posljednje tri godišnje ocjene ocijenjen odličnom ocjenom;
- b) da je postigao izvanredne rezultate u svom radu i da je značajno doprinio povećanju sigurnosti u Brčko distriktu BiH i njegovih građana;
- c) da je proveo u trenutnom činu najmanje pola vremena propisanog za sticanje višeg čina i koji ispunjava ostale uslove iz člana 83 ovog zakona;
- d) da je od rukovodioca osnovne organizacione jedinice u kojoj je raspoređen predložen za posebno unapređenje.

(2) Policijski službenik može biti posebno unaprijeđen najviše jedanput u toku svoje profesionalne karijere.

(3) Policijski službenik ne može biti posebno unaprijeđen u čin glavni inspektor.

(4) Prijave za posebno unapređenje razmatra Komisija za unapređenja iz člana 85 stavova 3 i 4 ovog zakona.

(5) Odluku o posebnom unapređenju iz stava 1 ovog člana donosi šef Policije, na osnovu prijedloga Komisije za unapređenje.

(6) Postupak i kriteriji za posebno unapređenje policijskog službenika uređuje se propisom iz člana 82 stava 3 ovog zakona.

(7) Ukoliko je odluka o unapređenju u viši čin poništena pravosnažnom sudskom presudom, policijski službenik se raspoređuje na radno mjesto u činu koji je imao prije unapređenja.”

Član 19

U članu 87 stavu 7 riječi: „77 stava 5” zamjenjuju se riječima: „82 stava 3”.

Član 20

Član 92 mijenja se i glasi:

„Član 92

(Plate i naknade policijskih službenika)

Policijski službenici pravo na platu, naknade i druga primanja na radu i po osnovu rada ostvaruju na način i pod uslovima utvrđenim Zakonom o platama i naknadama zaposlenih u Policiji Brčko distrikta Bosne i Hercegovine.

Član 21

Član 93 mijenja se i glasi:

„Član 93

(Dodatak na platu za posebne uslove rada)

(1) Zavisno od rizika, složenosti poslova, posebnih uslova rada i primjene ovlaštenja na određenim radnim mjestima, šef Policije odlučuje o trajnom dodatku za posebne uslove rada na tim radnim mjestima.

(2) Dodatak za posebne uslove rada je trajno vezan za radna mjesta iz stava 1 ovog člana te ne može biti izmijenjen ukoliko ne nastupe novi posebni uslovi rada.

(3) Dodatak za posebne uslove rada iznosi do 30 % (trideset posto) osnovne plate.

(4) Uz dodatak iz stava 3 ovog člana u posebnim okolnostima, određenim radnim mjestima pripada pravo na veći trajni dodatak na osnovnu platu u iznosu od 10 % (deset posto) osnovne plate, koji se ostvaruje pod uslovima propisanim Zakonom o platama i naknadama zaposlenih u Policiji Brčko distrikta Bosne i Hercegovine.

(5) Propis kojim se određuju radna mjesta koja imaju pravo na trajni dodatak donosi šef Policije uz saglasnost Vlade.“

Član 22

Članovi 94, 95, 96, 97, 98, 99, 100, 101, 102 i 103 se brišu.

Član 23

U članu 109 stavu 1 riječi: „Odmor u toku radnog dana se ne uračunava u radno vrijeme” se briše.

Član 24

Član 115a se briše.

Član 25

Član 118 mijenja se i glasi:

„Član 118

(Teže povrede službene dužnosti)

(1) Teže povrede službene dužnosti su:

a) neizvršavanje, nesavjesno, nepravovremeno ili nepažljivo izvršavanje službenih zadataka, ukoliko je nastupila teža posljedica;

b) izbjegavanje obaveza vezanih za profesionalnu obuku i usavršavanje;

c) neopravdano odsustvo s dužnosti u trajanju od dva uzastopna dana;

d) neovlašteno korištenje sredstava povjerenih radi izvršavanja zadataka i dužnosti;

e) vršenje aktivnosti koje su nespojive sa službenim dužnostima iz člana 50 ovog zakona;

f) ponašanje koje onemogućava, ometa ili otežava izvršavanje službenih zadataka drugim zaposlenima Policije;

g) nepružanje stručne pomoći građanima u ostvarivanju njihovih zakonskih prava;

h) ponašanje koje narušava ugled Policije;

i) nepreduzimanje ili nedovoljno preduzimanje mjera u okviru vlastitih dužnosti neophodnih za osiguravanje objekata, lica i povjerenih sredstava i stvari, ukoliko je nastupila teža posljedica;

j) sprečavanje građana ili pravnih lica u ostvarivanju njihovih prava pri podnošenju zahtjeva, žalbi, pritužbi, molbi i drugih podnesaka, ili neodlučivanje po tim podnescima u zakonskom roku;

k) nepružanje pomoći drugom policijskom službeniku koji traži pomoć kada mu je pomoć neophodna za izvršavanje njegovih službenih zadataka;

l) prikrivanje činjenica o načinu izvršavanja službenih radnji ili upotrebi sile od drugog policijskog službenika koji je načinom izvršenja službene radnje ili upotrebom sile učinio težu povredu službene dužnosti;

m) činjenje ili nečinjenje koje vodi otkrivanju tajnih podataka;

- n) samovoljno napuštanje dužnosti ili mjesta čuvanja određenog objekta ili lica koje može imati štetne posljedice za Policiju;
- o) dolazak na posao uz prisustvo alkohola ili narkotika u organizmu u bilo kojoj količini što se utvrđuje odgovarajućim metodama ili sredstvima, ili konzumiranje alkohola i narkotika u toku radnog vremena;
- p) odbijanje poligrafskog ispitivanja, sprečavanje, izbjegavanje, ometanje ili na drugi način odgađanje provođenja internih ili disciplinskih postupaka;
- q) narušavanje javnog reda i mira kojim se narušava ugled Policije, bez obzira na vrijeme i mjesto događaja;
- r) davanje netačnih podataka koji utiču na donošenje odluka nadležnih organa ili izazivaju druge štetne posljedice;
- s) neopravdano odsustvo s dužnosti tri ili četiri uzastopna dana ili najmanje pet dana s prekidima u toku jedne kalendarske godine;
- t) zloupotreba bolovanja;
- u) upotreba sile u suprotnosti s ovim zakonom;
- v) zloupotreba službenog položaja;
- w) odbijanje izvršavanja zakonitih naredbi izdatih u svrhu izvršavanja službenih zadataka i dužnosti;
- x) učestvovanje u političkim aktivnostima koje nisu u skladu sa službom policijskog službenika, bilo za vrijeme ili van dužnosti;
- y) vršenje diskriminacije pri vršenju dužnosti na osnovu: rase, boje kože, spola, jezika, religije, političkog ili drugog opredjeljenja, nacionalnog ili socijalnog porijekla ili po bilo kojem drugom osnovu;
- z) nedostavljanje traženih podataka, odnosno dokumenata u vezi s prestankom radnog odnosa u skladu s odredbama člana 142 stava 1 tačke e) ovog zakona u određenom roku.

(2) Teže povrede službene dužnosti iz stava 1 ovog člana stepenuju se bodovima na sljedeći način:

- a) povrede iz tački a) i b)5 bodova;
- b) povrede iz tački od c) do e)10 bodova;
- c) povrede iz tački od f) do j).....15 bodova;
- d) povreda iz tačke k).....20 bodova;
- e) povrede iz tački od l) do s).....25 bodova;
- f) povrede iz tački od t) do z).....30 bodova.

Član 26

U članu 129 stavu 1 riječi: „od l do y“ zamjenjuju se riječima: „od t do z“.

Član 27

U članu 130 stav 2 mijenja se i glasi:

„(2) Za teže povrede službene dužnosti interni postupak i disciplinski postupak moraju biti završeni u roku od deset mjeseci od dana kada je povreda prijavljena organizacionoj jedinici nadležnoj za unutrašnju kontrolu“.

Član 28

Član 131 mijenja se i glasi:

„Član 131

(Zastara pokretanja, vođenja disciplinskog postupka i izvršenja disciplinskih sankcija)

(1) Pokretanje i vođenje postupka zbog lakše povrede službene dužnosti zastarijeva u roku od tri mjeseca od dana saznanja za izvršenu povredu službene dužnosti i učinioa, a najduže u roku

od šest mjeseci od dana izvršenja povrede.

(2) Pokretanje i vođenje postupka zbog teže povrede službene dužnosti zastarijeva u roku od godinu dana od dana saznanja za izvršenu povredu i učinioca, a najduže u roku od dvije godine od dana izvršenja povrede.

(3) Izvršenje disciplinske sankcije za lakšu povredu službene dužnosti zastarijeva u roku od tri mjeseca, a za težu povredu službene dužnosti u roku od šest mjeseci, računajući od konačnosti rješenja kojim je disciplinska sankcija izrečena.

(4) U pogledu toka i prekida zastare pokretanja i vođenja postupka, odnosno izvršenja disciplinske sankcije, primjenjuju se odgovarajuće odredbe Krivičnog zakona Brčko distrikta BiH.

(5) Izuzetno u slučajevima iz člana 130 stava 3 ovog zakona rokovi zastare ne teku.“

Član 29

Član 133 mijenja se i glasi:

„Član 133 (Brisanje iz evidencije)

(1) Disciplinske sankcije za lakše povrede službene dužnosti brišu se iz evidencije nakon jedne godine od dana pravosnažnosti rješenja kojim je izrečena disciplinska sankcija, ako policijski službenik u tom roku ne učini novu povredu.

(2) Disciplinske sankcije za teže povrede službene dužnosti se brišu iz evidencije nakon tri godine od dana pravosnažnosti rješenja kojim je izrečena disciplinska sankcija, ako policijski službenik u tom roku ne učini novu povredu.

(3) Postupak brisanja disciplinskih sankcija pokreće se i provodi po službenoj dužnosti ili na zahtjev policijskog službenika.

(4) Šef Policije u skladu sa stavom 3 ovog člana donosi rješenje o brisanju disciplinske sankcije.

(5) Primjerak rješenja o brisanju disciplinske sankcije ulaže se u personalni dosje policijskog službenika.

(6) Nakon brisanja disciplinske sankcije smatra se da policijski službenik nije disciplinski kažnjavan.“

Član 30

Član 134 mijenja se i glasi:

„Član 134 (Suspendzija)

(1) Policijski službenik se obavezno suspenduje iz Policije ako mu je određen pritvor počevši od prvog dana pritvora.

(2) Policijski službenik može, na prijedlog rukovodioca organizacione jedinice čiji je pripadnik ili rukovodioca organizacione jedinice za profesionalne standarde, biti suspendovan sa zadatka i dužnosti koje vrši ili suspendovan iz Policije:

- a) ako je protiv njega potvrđena optužnica i ako bi njegovo prisustvo na radu štetilo interesima i ugledu Policije;
- b) ako postoje osnovi sumnje da je počinio krivično djelo ukoliko bi to štetilo ugledu Policije;
- c) ako je protiv njega pokrenut disciplinski postupak za težu povredu službene dužnosti za koju se može izreći disciplinska sankcija prestanak radnog odnosa;
- d) ako je pokrenut disciplinski postupak za težu povredu službene dužnosti, a postoje razlozi da se vjeruje da će policijski službenik uništiti dokaze ili na drugi način ometati odvijanje disciplinskog postupka;
- e) ako postoje osnovi sumnje da je počinjena teža povreda službene dužnosti ili ako je protiv

njega pokrenut disciplinski postupak, a uzevši u obzir prirodu teže povrede službene dužnosti i okolnosti pod kojima je izvršena, može osnovano vjerovati da bi njegov rad štetio interesima službe ili postupku.”

Član 31

Član 142 mijenja se i glasi:

„Član 142 (Osnovi prestanka radnog odnosa)

(1) Radni odnos policijskog službenika prestaje u sljedećim slučajevima:

- a) kada policijski službenik svojevolarno da otkaz;
- b) kada policijski službenik na kraju probnog rada dobije ocjenu: «ne zadovoljava» u skladu s članom 71 stavom 2 ovog zakona;
- c) kada ne položi stručni ispit u skladu s članom 153 stavom 1 ovog zakona;
- d) kada neopravdano izostane s posla najmanje pet (5) dana uzastopno;
- e) kada ispuni uslove za ostvarivanja prava na penziju u skladu s entitetskim propisima koji uređuju oblast penzijskog i invalidskog osiguranja, s tim da se poseban staž u dvostrukom trajanju, kao i period od 18. 9. 1991. godine do 19. 6. 1996. godine s efektivnim trajanjem, računa samo na zahtjev i uz pisanu saglasnost policijskog službenika;
- f) ukoliko je proglašen viškom u skladu s članom 76 stavom 6 ovog zakona;
- g) kada dva puta uzastopno dobije negativnu ocjenu za rad u skladu s članom 90 stavom 2 tačkom b) ovog zakona;
- h) gubitka državljanstva Bosne i Hercegovine;
- i) kada je pravosnažno izrečena kazna zatvora u trajanju dužem od šest mjeseci, danom pravosnažnosti presude;
- j) kada je policijskom službeniku pravosnažno izrečena disciplinska sankcija prestanak radnog odnosa zbog povrede službene dužnosti, danom pravosnažnosti odluke;
- k) smrti policijskog službenika;
- l) kada se policijski službenik prijavi kao kandidat za izbornu javnu funkciju ili od trenutka kad je imenovan na položaj unutar bilo kojeg organa vlasti u Bosni i Hercegovini, u skladu s odredbama člana 50 stava 2 ovog zakona i člana 48a stava 2 Zakona o Policiji Brčko distrikta Bosne i Hercegovine.

(2) Po prestanku radnog odnosa gubi se status policijskog službenika.“

Član 32

Iza člana 142 dodaju se novi članovi 142a i 142b koji glase:

„Član 142a (Uslov za ostvarivanje prava na penziju policijskog službenika)

(1) Policijski službenik, kome je to posebnim entitetskim zakonom omogućeno, pravo na penziju ostvaruje u skladu s entitetskim zakonima o penzijskom i invalidskom osiguranju i članom 142 stavom 1 tačkom e) ovog zakona, pod uslovom da je:

- a) imao neprekidno najmanje 15 godina staža osiguranja u svojstvu policijskog službenika i
 - b) u vrijeme sticanja prava na penziju ima svojstvo policijskog službenika.
- (2) Policijskom službeniku iz stava 1 ovog člana lični koeficijent za ostvarivanje prava na penziju utvrđuje se na osnovu pet godišnjih plata ostvarenih u svojstvu policijskog službenika, koje su za policijskog službenika najpovoljnije.

(3) Odredbe stava 2 ovog člana odnose se i na policijskog službenika koji usljed zadobijenih povreda na radu uzrokovanih neposrednim izvršenjem službenih poslova i zadataka bude proglašen invalidom 1. kategorije.

Član 142b (Obaveznost dostavljanja podataka)

(1) U postupku utvrđivanja ispunjavanja uslova za prestanak radnog odnosa u skladu s odredbom člana 142 stava 1 tačke e) ovog zakona, policijski službenik je dužan dostaviti dokaze koji se ne mogu pribaviti službenim putem.

(2) Policija je dužna obavijestiti policijskog službenika koji ispunjava uslove za prestanak radnog odnosa u skladu s odredbama člana 142 stava 1 tačke e) ovog zakona najkasnije šest mjeseci prije sticanja uslova za prestanak radnog odnosa.“

Član 33

U članu 146 stavu 1, iza riječi: „godine” umjesto zareza „(,)” stavlja se tačka „(.)”, a riječi: „s mogućnošću drugog uzastopnog mandata“ se brišu.

Član 34

Član 147a se briše.

Član 35

Član 152 mijenja se i glasi:

„Član 152

(Započeti postupci prestanka radnog odnosa radi penzionisanja)

Svi postupci za utvrđivanje ispunjavanja uslova za prestanak radnog odnosa policijskog službenika u slučaju iz člana 142 stava 1 tačke e) ovog zakona, započeti u skladu s odredbama zakona koji je bio na snazi prije stupanja na snagu ovog zakona, okončat će se u skladu s odredbama ovog zakona.”

Član 36

U članu 157 iza stava 2 dodaje se novi stav 3 koji glasi:

„(3) U roku od šest mjeseci od dana stupanja na snagu ovog zakona Vlada je dužna donijeti propis o postupku izbora i zapošljavanja policijskih službenika iz drugih policijskih organa u BiH (član 64a stav 4).“

Član 37

U članu 158 iza stava 1 dodaje se novi stav 2 koji glasi:

„(2) U roku od šest mjeseci od dana stupanja na snagu ovog zakona, šef Policije donosi propise o:

- a) načinu provođenja testiranja pomoću poligrafa (član 15a stav 2);
- b) vrstama i načinu psihološke pomoći i podrške, te stručnom usavršavanju policijskog službenika za savladavanje psihičkih opterećenja (član 47a stav 3);
- c) proceduri unapređenja, načinu ocjenjivanja i bodovanja kriterija iz člana 83 stava 3 ovog zakona (član 82 stav 3).“

Član 38

Iza člana 158c dodaje se novi član 158d koji glasi:

„Član 158d (Preuzimanje poslova)

Policija preuzima obavljanje svih poslova vezanih za radno-pravni status policijskih službenika nakon što se osiguraju finansijske, kadrovske i materijalne pretpostavke za izvršavanje ovih poslova u Policiji, a najkasnije do 31. 12. 2019. godine.“

Član 39

Iza člana 159 dodaje se novi član 159a koji glasi:

„Član 159a (Prečišćeni tekst)

Zadužuje se Zakonodavna komisija Skupštine Brčko distrikta Bosne i Hercegovine da utvrdi prečišćeni tekst Zakona o policijskim službenicima Brčko distrikta Bosne i Hercegovine u roku od 90 dana od dana objavljivanja ovog zakona u Službenom glasniku Brčko distrikta BiH.”

Član 40

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-639/19

Brčko, 12. 6. 2019. godine

**PREDSJEDNIK
SKUPŠTINE BRČKO DISTRIKTA BiH**

Esed Kadrić